

Herremättli-Clique 1987

Sujet:

Kasch d'Kasse go muuse D'Gardische dien pfuuse!

Dr Giorgio, dr Enzo und dr Adrian,
die wisse: s schtobt e Tresor im Vatikan.
Kunnsch aa per Cadillac, vyllicht au per Mercedes,
denn darfsch als Bischof oder Kardinal per pedes
unkontrolliert und ohni ebbe miesse z'warte
verbygoh an der Bolizey und an dr Schwyzergarde.
Im Kirchengeschdym kasch ans Bett vom Papst spaziere,
wenn d'Schwein hesch, dien no alli salutiere!

E Gangschter, wo das waiss, isch zimlig waiser:
Aer, wo in Vatikan will, haut's zem Goschdym-Kaiser,
verlangt e Nonneschale oder au e Bischofsschurz,
denn ka-n-är schnällschtens, wie ne Reagan-Furz
dur s' Törli und dur d'Schwyzergarde duure.
(Die luege blooss uff d'Kutte, nit uff d'Gangschterschnuure
und drugge baidi Auge zue, fascht wie die Blinde.)
So isch's schtinggaifach, dr päpstlig Tresor z'finde!

Do froggsch dy denn, was d'Schwyzergarde nitzt!
Wird äggscht dr Papst vo däne gniegend gschitzt?
Gsehn die us ihrem Helm vyllicht doch z'wenig uuse?
Dien die - statt wache - ehnder lieber pfuuse?
Hänn die äggscht d'Hellebarde braitwäggs vor den Auge?
Was soll die Schwyzergarde denn no tauge?
Uns dunggt, dr Papst kennt uff dr Himmel zelle
und sott - statt Schwyzer - dert en Aengelsgarde bschtelle.

Erzängel käme denn, mit Flammeschwärt, dien blitze,
Schutzängel, ganzi Schaare, flingg im Ummeflitze.
Me kennt e Kirche-Bannstrahl rings um alles leege
und s'SDI vom Reagan wär dynn Bier drgeege.
Weyhwasser-Gräabe kennt me denn als
Superschutz verwände,
au Wehyrauch-Vorhäng oder Kerzehääg, wo blände.
Im Bychtstuehl liess sich zimlig lycht e Wach verstegge,
wo jede Dieb mit Ooschterglogge wurd zem Deyfel schregge.

Dr Mars als Grieger und dr Merkur als sy Knächt,
die luegten us em Kosmos, parat zem Gfächt;
dr Petrus kämti us dr Portierloge fire
und schiggti Hitzestrahle us dr Fägfyrdiire;
d'Posaunenängel wurde jüngschtgrichtig bloose,
do gieng bym schlimmschte Gangschter glatt
dr Schuss in d'Hose.

By so me Uffgebott an himmelhooche Gselle
hätt au e Schwyzergarden absolut nyt z'bschtelle.

Die gienge däwääg, quitschfideel und munter,
wie d'Fuessball-Nazi sang- und klangloos unter
und scho no zäh Minute - bruuchsch fascht e Computer -
wär's 12 : O fir dr FC Himmelschutter!

Drum mechte mir dr Papst uff unsre Vorschlaag längge,
d'Sicherhait vo sym Bsitztum nomool z'iberdängge.
Die himmlischhoochi Heerschar käm,
trotz vülen Aafangsschnitzer,
bschtimmt vyl billiger, als alli tyyre Schwyzer!

Bsueche Sy am Zyschdig zmidaag au
d'Ladärnen-Usschtellig uff dem Minschterblatz?